

平定粵匪紀略

平定粵匪紀略卷五

咸豐六年丙辰正月江南軍敗竄賊於倉頭

瓜州逆屢出衝突金陵逆遣大隊援之托大臣檄副都統德興阿都司趙樹棠屢敗賊於土橋虹橋尹家橋瓜州逆不敢復出金陵援賊亦受創去初金陵逆糾合上游來賊以數萬計由陸路嘯聚於倉頭鎮聲勢頗壯余提督萬青虎總兵嵩林等分途抄殺賊鋒不可止遏總兵張國樑奮銳摧其中堅截賊不能首尾顧各軍乘之俘斬數千賊始潰遁

皖軍克復舒城縣

廬州復後和提督會商福巡撫以南路舒城東路巢縣皆賊久踞爲廬郡腹背患宜分兵攻之一軍由柘臯進攻巢縣一軍攻舒城和提督與總兵郝光甲珠克登等赴舒城分門攻擊已革總兵晉德布首先由東門登城各軍掩殺斃賊三千餘名縣城立復是日總兵鄭魁士分擊三河踞逆亦獲勝

二月楚南援師克復江西萍鄉縣

時江西賊勢猖獗瑞臨未復吉安府復於正月二十

五日被陷湖南邊界均戒嚴今直隸劉總督長佑從軍江楚屢以戰功擢候選道時在江西統兵勇回湘援勦由醴陵進攻萍鄉二月十一日有黃衣賊目自葡萄口出撲我軍圍之數重賊目入民舍自焚死諸賊乘夜鼠竄遂復縣城

楚南軍擊破吳城賊復建昌縣

賊踞吳城復陷建昌縣曾侍郎以水師之在吳城者無陸軍依助恐致挫失遣都司黃虎臣率三營步兵馳赴吳城相機進勦二月二十二日賊出數千人逼

沙洲河而陳水師哨官許志清突陣被刺獲救免虎  
臣乃分軍二隊一繞其後一背水出其前鼓勇夾擊  
我軍始振水師亦轟礮助勢遂大破賊衆追至建昌  
縣賊開門遁收復其城

三月瓜州鎮江逆合攻揚州城陷之旋爲官軍收復

咸豐三年逆陷鎮江時有捐職都司劉廷鏞販商也  
帶湘勇從上海來勇而足智敗賊於鎮江之南門逼  
城爲壘是年六月援鄧提督紹良於丹陽復至鎮城  
扼守逆不敢南向者二年廷鏞戰死賊乃猖獗附鎮

城江中水營二一總兵周士法部浙艇泊焦山一總  
兵陳國泰部粵艇泊金山而瓜州逆結連鎮城逆往  
來金焦間晏如也二月杪鎮江逆渡江糾合瓜州逆  
突然內犯金陵逆又撥大股助之三月初一日復陷  
揚州知府世焜參將祥林力戰捐軀托大臣兵潰退  
保北路副都統德興阿帶馬隊衝突遏賊進竄賊乘  
間撲東路萬福橋意圖擾及裏下河經總辦糧臺江  
甯布政使文煜帶勇擊退

詔革托大臣及幫辦提督陳金綬前侍郎雷以誠職加德

與阿都統銜爲

欽差大臣以在營之總督府少詹事翁同書幫辦軍務德  
大臣親督總管西昌阿等耀兵於揚城西北隅破薛  
家樓撲營悍賊直擣中堅轉戰皆捷賊遂披靡潰遁  
十三日收復揚州

布政使銜浙江甯紹台道羅澤南力攻武昌城死之

澤南湖南湘鄉縣諸生講學宗法程朱體用兼備咸  
豐二年賊犯長沙卽倡率生徒爲團練忠義至性感  
動鄉里遂率其鄉人轉戰三楚江西大小二百餘戰

克城二十所向悉身先士卒由訓導超擢浙江甯紹  
台道加布政使銜至是力攻武昌焚營實陽門外之  
洪山三月初二日乘勝追勦直抵城下左額中槍子  
入腦至初八日因傷殞命事聞

上深加憫惻照巡撫例優卹之胡巡撫派澤南弟子記名  
道安慶府知府李續賓統其眾

逆匪陷江浦縣踞浦口攻六合官兵擊卻之旋復浦口  
江浦

楊城賊圍入江浦縣分股由寶鳳莊等處抄至浦口



總兵武慶退保六合縣賊復隨攻之德大臣派總兵  
穆克登額督帶馬隊馳往向大臣派總兵張國樑帶  
兵渡江來援駐六合之龍池逆黨由毛許墩焚掠而  
至張國樑俟賊近揮兵衝擊斬其目餘黨卽潰追至  
水家灣適畱署六合縣事知府溫紹原督兵至合力  
攻勦斃賊一千餘名賊竄浦口張國樑會穆克登額  
武慶等追擊又敗賊於葛塘集隨於十八日克浦口  
二十三日復江浦縣

安徽甯國府失陷皖南逆氛復熾

逆匪經皖浙防軍追勦復由太平涇縣犯甯國府三月二十八日陷之逆氛復熾向大臣派兵馳往勦辦四月楚軍督黃州練勇擊援賊於新洲敗之

江西省城頻告警會侍郎撥兵赴援其駐潯水陸各軍僅得自衛九江逆上突麻城縣至新洲修營築壘搜掠民糧爲牽掣武漢計衆約三萬官大臣檄黑龍江營總多隆阿吉林參領額爾庫等率馬隊會同黃州府知府許廣藻督集鄉團助勦行至柳子港西岸賊於東岸列陣以迎馬隊從淺水渡將弁有傷者裹

創牆進賊不能禦紛紛潰退軍功吳之傑偵賊欲歸  
三店巢謂所屬勇曰楊汭河者三店必由之渡大軍  
馬隊破其前我當以民勇勝其後乃伏勇叢葦處賊  
果至泗水乘其不備槍礮齊施無虛發生擒偽檢點  
指揮將軍各一人長髮賊八十餘人進勦三店馬隊  
隨至圍斬無算毀其營壘未及新洲三十里賊棄寨  
遁追敗之於團風鎮鷲公頸焚賊屯聚一空竝獲木  
簞二裝載而還

楚南軍克復江西東鄉進賢二縣會圍撫州水師復豐

城縣

逆復踞樟樹鎮撫州被陷曾侍郎派兵分路往勦同知李元度率留饒之軍取道東鄉會知縣吳朗帶團勇於三月二十日克復縣城知府鄧輔綸同知林源恩副將周鳳山自進賢進三月十二日克進賢縣會於東鄉二十七日乘霧攻撫州破其對河賊壘五座四月初二日李元度督勇挽搭浮橋賊以大股來撲兩軍相持間李元度念搭橋劇難不若乘隙飛渡因令左營新中營用小划先濟各哨濟之半解衣斃水

閱兩時畢渡連日猛攻屢敗踞逆及建昌來援之賊以城堅賊衆未能遽復記名道劉于瀆帶水師二營防上游瑞臨之賊因豐城被賊占踞四月初十日督船往攻豐城一線單隄賊得隱避船礮不能及乃於二十日初更三門放礮攻擊督帶哨勇登岸各持火具燒其南門外賊壘賊疑陸軍已至向樟樹鎮逃竄遂復縣城

江蘇巡撫吉爾杭阿擊金陵援賊於高資力戰死之吉巡撫至鎮江受幫辦軍務任慨然謂攻堅不如斷

糧野戰不如扼要高資者賊運糧要道也飭候補道  
江甯府知府劉存厚結三營於高資煙墩山以扼之  
金陵逆大恐出賊衆數萬由句容會鎮逆盡銳犯高  
資存厚被圍知縣松壽鹽知事張翊國均戰死諸將  
各固壘圖保守巡撫所統不及萬人或說巡撫曰賊  
護糧而來生死所關其鋒不可敵姑撤此營鎮江賊  
喜於得命必不我迫巡撫憮然曰我以一部郎不數  
年位開府仗節磨受

國恩厚矣今一戰而捷賊糧必斷逆穴可平上解

聖主之憂下甦生民之困詎可避難趨易遂率親兵小隊馳往救之衝入高資營賊衆四合巡撫登高瞭望中擡礮立亡存厚左右衝突欲翼其尸出不克血戰死京口副都統綳濶已戰脫哭曰吾與吉公偕入吉公死吾何忍生亦自投江死

五月江南軍馳勦援賊於鎮江克之賊竄回金陵向大臣聞吉巡撫之難遣總兵張國棟馳救五月十五日戰於丁卯橋勝之又勝之於五峰口磨笄山游擊李鴻勳自丹徒鎮至總兵余萬清李志和自徒陽

運河至福將軍與副都統德崇額督馬步隊自京峴  
山至會張國樑兵四面兜勦斬賊數百級賊回走九  
華山張國樑夜往襲其營破之賊皆棄壘走游擊張  
玉良亦敗賊於東陽甘家港大軍尾追之竄入金陵  
城賊又分股陷溧水向大臣撥兵馳勦之

### 江南大營失陷

鎮江圍甫解賊回金陵議夾攻以撼我大營於是鎮  
江之賊趨江甯從東而西江甯之賊從西而東溧水  
大小關金柱黃馬等處之賊湧出衝擾向大臣因分



勦甯國溧水屢經抽撥兵力過單遂不能止遏城逆  
復出通濟門會紫荊山羣匪撲七橋甕大營官兵正  
併力截殺各營同時火起兵勇潰散張國樑突圍保  
向大臣衝鋒而出收聚散卒由涇化鎮退保丹陽

楚軍殲除水陸擾賊開長濠困武昌城竝克復安徽英  
山縣

楚軍破新洲援賊後官大臣與胡巡撫會商乘賊驚  
魂未定先派水師下擊以清江面遂令揚載福督六  
營礮船於四月三十日下駛遇賊船卽焚靡戰不勝

如破竹勢數百里賊船資糧掃蕩一空五月初四日抵九江盡燬江面逆船初九日仍回沙口十日之間往返千里賊衆驚爲神奇陸路援賊石達開率衆至武昌縣之葛店胡巡撫將省城下青山嘴塘角開挖長濠由大江直通南岸嘴以拒援而困城逆連戰皆捷追援賊至樊口斃賊數千先有另股賊由安徽突入英山縣城撲羅田署黃州府知府許廣藻督代理羅田縣彭應鯉率紳練敗賊於樂利河乘勝追襲四月二十三日克復英山縣復有九江股逆合蕪州之

賊上竄亦經彭應鯉帶七區勁勇會同官大臣所派  
四品軍功馬有功夾攻於嚴家坳殺賊千餘生擒二  
十七名餘匪翻山遁去

六月楚南水師收復江西南康府

南康外接大江內控鄱湖爲全省水道總匯前爲水  
師入內湖時埽蕩迨樟樹鎮失利調分駐青山屏風  
之水師移紮吳城南康復爲賊踞曾侍郎遣水師彭  
玉麟等於六月十四日往勦賊方督民夫造戰船未  
竟連勝焚燒其業艦延及岸上積聚竝令各船擡高

礮口使礮子轟入城中賊大驚開門遁收復府城  
楚軍乘勝攻黃州竝截勦漢陽竄賊

六月初六日沙口陸營獲逆諜得僞文爲八十指揮  
熊逆知照漢陽賊首僞尙書鍾逆者云九江逆石達  
開憤樊口之敗大集逆黨萬餘卽日由廣濟蘄水黃  
岡至漢鎮令逆衆堅守以待官大臣密派荊州將軍  
都興阿率馬步由陸路進至黃州上二十里之堵城  
投誠四品軍功范潮蘭赴東路爲前隊都司王玉琳  
繼之派劉藍田赴西路爲前隊馬有功繼之馬隊則

以營總多隆阿統帶擇要埋伏步隊則與知府許廣  
藻督團勇會合相依倚賊衆果由下游驟至我軍奮  
勇兜合砍倒執旂賊目一人長驅直入左邊右決殺  
聲震天地斃賊極多餘匪四竄沿湖溺死者無數我  
軍乘勝齊會黃州城下盡毀賊壘其武漢之賊尙死  
守官大臣與胡巡撫分南北岸逐日攻逼大小數十  
戰均獲勝

江南軍大破逆衆於丹陽城外

大軍退保丹陽後逆衆分途逼近重營壘壘以百計

和定橋鳳凰岡五里牌黃莊橋皆賊巡徼所據也  
大臣晝夜憂憤疾轉篤張提督國棟密商諸將謂  
以吾主帥病危衆皆驕怠諸君若舍生努力擊之必  
大克衆皆唯命乃遣參將虎坤元游擊張玉良督馬  
步先攻五里牌焚賊寨柵渡河至黃莊橋破其礮臺  
副將秦如虎由定埠南渡截賊衝創斃極多明安太  
虎嵩林旁伏伺勦亦有斬獲張國棟偕福將軍興整  
大隊撲賊巢縱火廬戰遂奪和定橋賊衆大潰鳳凰  
岡之賊亦不戰而遁追至黃土橋斬級數千丹陽城

外賊壘悉平捷聞

詔以提督銜福建漳州鎮總兵張國棟幫辦大營軍務

七月楚南軍合江西軍圍攻瑞州府江湘路通

瑞州府居江湘之衝自逆踞文報多阻有南北城北  
曰官城南曰民城中隔一河四月初參將承堯普同  
知吳坤修會國華知縣劉騰鴻帶楚南兵勇勦咸甯  
蒲圻崇陽通城新昌上高等縣之賊悉復其城於七  
月初三等日馳抵瑞州會侍郎亦先後撥兵勇六千  
合勦拔南城韋逆昌輝自臨江赴援至北城遂資以

爲雄驟挑戰我軍堅持不動昌輝儀衛奢僭勁悍前  
驅劉騰鴻曰是羊質虎皮不久見軀宐乘其敝攻之  
旬餘賊跳浪氣衰我軍彌厲從北岸渡兵抄其後南  
城勝兵角其前賊受創大敗我軍圍攻北城自長沙  
以至南昌文報無道梗憂江右全局始振

江南向大臣卒於軍

大軍既移營丹陽嬰城固守而賊重圍密壘勢甚鴟  
張有以退保勸者向大臣太息曰吾病不能進何顏  
更南走當死於此耳遂以軍事付幫辦張提督國樞



曰汝才足辦賊吾死何憾復踴身疾呼曰終負

朝廷恩一慟而絕向大臣自道光三十年調任廣西提督  
卽勦粵匪追賊東下直抵金陵大小千百戰嘗自鑄  
私印曰誓滅此賊乃大功未定竟以積勞殞於軍奉  
旨優卹竝

賞世職江左紳民以數載勤勞爲東南保障實能禦災捍  
患呈准入祀江蘇名宦祠是時張提督已擊走丹陽  
諸賊賊竄金壇卽偕福將軍興派總兵虎嵩林等赴  
金壇督精銳渡河破賊尋奉

旨命江南提督和春爲

欽差大臣馳赴丹陽接統軍務人心以安

楚南水師疊敗賊船於瑞河口臨江口謝師塘等處

逆匪自陷吉袁瑞臨諸府城銳意修戰船議秋間大  
舉圍撲省城瑞臨賊船出而下湖口賊船入而上翼  
困我水師復於生米司瑞河口臨江口等處築立賊  
壘七月初一日由松湖帶戰船三十餘隻陸賊千餘  
將抵瑞河口我水師偵知之於瑞河口豫釘排樁出  
入僅可容一舟賊船笨重甫至排樁卽經我軍衝入

縱火環燒之記名道劉于瀆督師船堵賊臨江口破  
其礮臺盡焚賊船生米口之賊聞瑞河口敗亦棄壘  
遁彭道玉麟水師自收復南康後率船巡哨適見下  
游謝師塘逆旂招展自神雪湖列陣而出對敵逾時  
賊舟敗北追至屏風山下南風忽起賊黨返攻彭道  
傳令下旋與之坐戰賊復勢蹙敗去

八月皖軍大捷於三河

自廬州克復賊黨竄踞三河分營金牛一路壁壘相  
望屢抗我師和提督諜知有隙可攻八月十七日親

督文武麟瑞熊天喜江忠信等攜帶雲梯乘夜踰濠  
舉火賊棚房藥局一時騰燄木瓦燕飛用雲梯紛登  
石壘賊倉皇奪門而出逃往巢湖上船我軍追至擊  
燬賊船多隻先後斃賊五千餘名獲首三千餘級踐  
蹋溺水死者無數生擒僞指揮張大有僞將軍秦標  
盛等十一名匪黨二百餘名皖軍殺賊之功克廬州  
後以此爲最惟副將銜參將程智泉軍中最驍勇者  
以追賊受傷亡爲微憾云

楚南軍破賊於江西瑞州府收復靖安安義縣

官軍方駐瑞州府八月初一日僞指揮黃姓糾黨分五色旗出犯聲勢浩大我軍派定隊伍待其撲近以劈山礮禦敵賊陣大亂圍而殲之橫尸徧野窮追三十里羣賊將欲分竄有僞將軍石姓自九江來援勒羣賊回瑞州初四日劉騰鴻普承堯彭山峴羅萱等軍出隊盡蹋賊壘前官軍急攻瑞州時上高新昌二縣又爲賊踞湖南之路復梗乃抽派吳坤修相機進勦先於七月二十日將二城之賊掃除遂於八月初八日行抵奉新連戰數日十三日收復靖安十六日

收復安義次日仍回奉新

江西邊錢會匪起句結粵匪竄擾建昌一帶圍廣信府擊卻之

江西吉安建昌等府屬有邊錢會名目以錢塗硃描金爲號屢禁愈衆遂句同粵逆竄入南豐縣連陷新城瀘溪貴溪等縣圍攻廣信今江西巡撫沈葆楨時署廣信府籌餉於河口鎮聞貴溪失守單騎馳回函招浙江派防玉山之貴州安義鎮總兵饒廷選赴援甫抵城賊已圍聚城外吏民盡散沈葆楨徒步守陣

妻林氏爲前雲貴總督林則徐之女同在危城中無媪婢弱汲爨具壺漿以饑士卒八月十二等日開城擊賊斃三千餘人斬其渠帥餘匪潰遁郡境肅清

江南軍克復高淳縣進攻溧水句容

總兵傅振邦克復東壩後於八月二十三日直抵高淳界立營賊分途迎拒擊走之親督大軍會高淳文武各員進剿縣濱湖蘆葦苞蘘塞港蔽洲賊潛伏以狙害官兵先遣參將李定泰等帶練勇爲鄉導燒賊艇數十伏賊多誅死遂克高淳縣進攻溧水張提督

國樑亦攻克寶堰賊巢乘勝進攻黃茅莊拔之移營  
句容

偽北王韋昌輝殺偽東王楊秀清昌輝復爲偽天王洪  
秀全所殺偽翼王石達開竄安慶

向大臣薨後金陵羣逆相慶次逆首偽東王楊秀清  
素以洪秀全爲贅疣至是陰有自立意令其下呼以  
萬歲洪秀全趣召偽北王韋昌輝偽翼王石達開歸  
密圖之昌輝先至秀清招之飲昌輝戒備以往飲次  
抽刃刺秀清洞胸割而烹之盡殺其黨石逆自湖北



至賁韋逆太酷韋逆怒將併圖之石逆覺縋城夜遁  
韋逆悉誅其母妻子女洪秀全益懼乃密諭其黨與  
楊秀清餘黨共攻僞北王府韋逆乘亂逸出潛渡江  
爲楊秀清逆黨所獲縛送金陵寸磔之誅其族石達  
開遂竄安慶秀清傳昌輝首至甯國達開回金陵後  
因秀全猜忌復之皖

九月江楚軍克復江西宐黃崇仁縣

同知李元度林源恩統江楚兩軍轉戰撫建間自五  
月至八月小勝三十餘大捷亦十數賊星散蟻聚終

不得制其死命或說以宜黃崇仁者撫建二處賊所  
去來欲斷建昌莫若取宜黃欲斷撫州莫若取崇仁  
二人稱善曰此搃叻拊背計也從之九月初二日督  
舉人陳大力哨官彭厚坤等先攻宜黃城破之由北  
關直趨崇仁崇仁亦有官民二城與瑞州似二城之  
間隔一河中有大橋百長鍾廷陞首先衝橋伏賊突  
起短兵相接相持兩時彭厚坤等已登梯入城斫倒  
守礮二賊力開城門官兵齊入賊竄臨江

皖軍克復無爲州

無爲濱江久爲賊踞皖營自和提督渡江後福巡撫  
主軍務總兵鄭魁士副之飭各屬整飭團練助以官  
兵各圖克復八月二十八日派候選知府李元華督  
勇會前知州林蘭攻無爲州九月初二日設伏圍攻  
克之殲賊二千餘人沿途團練截擊又斃悍賊一千  
七百餘名

### 江南軍擊敗句容溧水賊

和大臣接統江南軍未至兩江怡總督良權其篆已  
遣將弁復高淳進逼句容溧水此二城近金陵爲逆

犄角九月初八日張提督奪近關橋十四五日敗賊於吉利邨擒斬無數復會總兵傅振邦參將虎坤元李定泰等抵溧水城下賊從小道襲我軍後我軍已踰濠附城奮勇回戰賊不得前溺死殲死者千計金陵逆聞之氣沮大營始安

皖軍大捷於巢縣復其城

賊踞巢縣堅城浚池水陸連壘無數擄糧掠饟輓饋金陵亦一老巢也福巡撫屢欲勦殄之聞援賊萬餘自裕溪上駛乃遣副將扎隆武等馳往截勦敗賊於

姚廟岡破丁家橋直抵縣城福巡撫與李編修鴻章  
督營官吉順嵩瑞于昌麟馬昇平知府恩禧等攻其  
西北門鄭魁士督麟瑞蕭開甲余兆清江忠信余成  
蛟等攻南門鄭魁士身受礮傷猶復督兵力戰遂於  
九月二十九日克復巢縣湖中賊連牆下援勒兵迎  
堵轟覆賊艇數百浮尸盈湖計旬日之內毀平賊營  
十三座礮臺十座卡二十殲斃七千餘賊生擒四百  
斬首三千餘級兼獲其偽印七十餘顆大礮二十六  
器械四千船隻千廬州所屬諸邑以次肅清是月提

督秦定三分兵擣桐城亦屢有斬擒旋因捻匪猖獗  
秦提督移師蒙亳鄭魁士督兵攻桐城

十月江西劉于涪一軍再克新淦縣

前自新淦克復後我軍進攻撫臨未能分兵甯防復  
爲賊踞十月二十一日劉于涪一軍督戰船黃夜襲  
之賊見人數無多負隅固拒蔡康業等分攻三門其  
西門濱大河礮船攻之賊見四面受敵於城上擲大  
黃旗二求暫解圍卽出投誠我軍以一晝夜未得少  
息收隊傳餐暗以稻草置城門洞以噴筒射入頃刻

火起城內鼎沸各勇蹋肩而入賊已開門逃竄

楚軍斷逆外援武漢逆圖竄路絕

賊糧道不通田鎮下游官兵扼其險要石逆達開先  
因楊韋二逆內亂已竄回金陵官大臣督臬司李孟  
羣總兵王國才攻漢陽東南兩路前荊州綿將軍知  
府魁聯往來策應平毀近城五里墩賊壘連紮大營  
四座環掘長濠以總兵楊昌泗統之外江內湖礮船  
巡防爲陸路聲援楊提督遣都司鄧清守之城賊危  
蹙思外竄十月十三日武昌賊擁眾渡江知縣李光

榮架礮轟截覆溺過半是夜副將顏朝斌亦圍殲漢陽賊於沌口生擒偽總制朱長清等上下嚴備賊圖竄之路以絕

十一月楚軍同日克復武昌漢陽城

先是襄陽縣北鄉竹篠鋪等處土匪朱中瑞黃其中等煽饑民爲亂焚燒樊城連陷豫省之鄧州新野官大臣抽調北岸兵勇千名派游擊溫發魁管帶與武昌道常恩馳往飭與駐襄之布政使馬秀儒等會商勦辦又隨州土匪趙邦璧藉募勇援襄爲名亦句引



土匪滋擾復分馬步往勦大營兵力稍薄不及大舉  
武漢二城之逆得少延殘喘嗣襄樊等處肅清諸將  
回營協力官大臣胡巡撫督戰益急漢陽地接荆襄  
外江內湖爲武昌屏障逆陷武昌自漢陽始克漢陽  
則武昌自復以是官大臣親督重兵圍漢陽水師則  
實成楊提督南岸則專倚胡巡撫漢陽逆久不能抗  
既拔五里墩後沌口水師泛舟下沙口礮船亦上駛  
水陸合攻臬司李孟羣總兵王國才楊昌泗分西南  
北三路盡破城外賊壘架雲梯攻城翼長巴揚阿平

海率馬隊繼之副將顏朝斌前提督孔廣順前總兵  
訥欽又繼之水營都司鄧清亦自襄河駛出環城轟  
擊十一月二十二日逆出數千賊於東門外拒戰礮  
子雨落兵勇皆蛇行而進數伏數起賊礮不能傷卽  
反奔我兵直抵城下盡拔其濠內竹簽楊昌泗自報  
國庵破城入王國才李臬司亦斬關而進衆軍鼓勇  
畢登或擣其衝或遮其軼合計斃賊七千有奇生擒  
僞將軍司馬師帥旅帥五百餘名奪獲大小礮一百  
三十二位守城逆渠僞丞相鍾姓僞指揮劉滿乘馬

下河被礮轟斃有從沙洲爭渡者爲水師擊盡有上  
船渡江者爲暴風覆舟江面浮尸紛若鳧雁是日胡  
巡撫楊提督同攻武昌省城上下夾擊水師斫斷橫  
江鐵鎖陸軍攀援登城逆不能守分七隊突門而出  
我軍乘勢兜圍殲賊萬計生擒僞檢點古文新等十  
四人斃先鋒悍賊八百餘黨匪五千餘二城同日克  
復官大臣胡巡撫入城安撫蓋省城自五年三月失  
守至是已二十一月矣前二次淪陷未有如斯之久  
也大功告竣遂息兵整旅分堵諸邊飛咨河南巡撫

英桂會勦鄧州新野餘匪先清北境卽擬東征

楚南軍克復江西分宜縣袁州府

楚南援軍轉戰數千里由萍鄉萬載合攻袁州九月以後屢破援賊袁城之逆於吉安等處糾合股匪悉屯合山候選道劉長佑等飛調在萬載之蕭啓江田興恕來袁助戰十月十六日蕭啓江等分三路進破合山之賊焚賊壘數里成焦土二十四日劉長佑派隊攻克分宜縣城援賊路絕十一月初一日游擊劉培元會諸軍攻袁州城誘賊出戰以精兵蹙之賊望

城奔竄而門牖已下而得入四散奔潰是夜諜知有以索縋城遁者我軍力迫之奪其索蹂緣而上啓北門納大軍入生擒僞檢點黃逆賊衆盡殲

克復安福縣

既拔袁州大軍欲進勦吉安府恐安福賊議其後未發適吉安府知府黃冕前湖北布政使夏廷樾前廣東羅定協副將周鳳山在湖南共籌援師勦吉安湖南駱巡撫遣同知今

封一等伯爵前浙江巡撫曾國荃帶湘勇二千人先發黃

晁夏廷樾繼之均由萍鄉入周鳳山由萬載入約定  
會攻安福以趨吉安庶無首尾憂十一月十二日鳳  
山至楓溪距安福四十里十三日國荃至江口距安  
福三十里均遇賊接仗斬驍悍數十守備劉之能楊  
光福亦踰大小嶺破其伏先後至城下守城賊目迎  
戰爲張開輯劈山礮轟斃卽克復安福縣城

防饒軍大捷追賊至鄱陽

饒州近鄱陽湖常被肆擾防饒者雲南臨元鎮都司  
畢金科勇而謀謂都司林保曰吾以二千人防饒聞

賊自建德東流來者五六千又探報李邱二賊目亦率三四路悍賊與之合統計近萬人此豈可力敵者非奇兵不爲功且鄱陽不靖饒州終無一日安乃於十一月十六日派營官襲廷貴領兵五百潛伏陶溪渡爲疑兵誡曰如官軍追賊至則出擊之畢金科分左右翼迎敵岳炳榮將右翼出其前朱洪章將左翼繞其後前隊遇賊故少卻賊追之後隊橫出截爲兩畢金科督壯士居中縱馬衝突當者披靡鏖戰至渡伏兵起賊猝遇大驚接應不暇登高望林中旂幟徧

滿以爲官兵大至相率逃竄乘勢兜裏斬獲千計追至鄱陽連戰連勝戈矛皆磨爇有聲賊衆盡颺去危城獲安

揚州軍擊瓜州逆勝之勦平高旺賊黨

逆踞江浦瓜州遠近亡命多依倚爲逋藪來安天長間土匪竊發假其聲勢嘯聚於高旺圖北竄德大臣遣總兵羅玉斌禦於小東店游擊魁霖等督步隊由東西葛進勦總管台斐音保等督馬隊分捕餘黨諸路皆捷盡殲賊之踞高旺者而瓜州援逆方出衆往



總兵鞠殿華督後隊迎擊之大敗援賊毀其望樓營  
柵前後浮斬約三千餘名

楚軍克復武昌縣黃州府分兵東下續克興國州大冶  
縣蘄水縣蘄州

克復武漢之日楊提督統水師乘勝清江面逃賊官  
大臣胡巡撫分師三路由甯灣出東興洲爲一路游  
擊何紹彩領之由雞窩出胡家墩爲一路游擊張寅  
恭領之馬隊大軍由魯家港繞出葛店爲一路都將  
軍及記名道李續賓領之賊望風瓦解大戰於樊口

各路斬首三千餘級於二十四日克復武昌縣城合  
兵圍黃州殲賊二千餘焚燒賊營毀水壘四座獲礮  
位百餘尊馬五十匹器械千餘件二十五日克復府  
城遂水陸竝下楊提督統帶長龍舳板等船破上下  
巴河賊卡焚奪賊舟數百隻直抵武穴陸路南岸李  
續賓由武昌縣進取興國大冶北岸都將軍由黃州  
擣蘄水蘄州或間道襲勦或分路兜擊各軍電掣星  
馳逐節掃蕩遂於二十六七八等日克復二州二縣  
湖南軍克復江西武甯縣

十一月初七日署武甯縣知縣冒溶擊賊於潘墩港  
兵潰縣城失陷冒溶等退紮豐溪適會侍郎調駐紮  
奉新之鄭奠帶義武營至居民憾賊深持鋤助戰逐  
北四十餘里十一日攻克縣城

十二月楚軍克復廣濟黃梅二縣

既克蘄黃征旆已徑指九江敗匪竄保黃梅廣濟二  
縣十二月初三日都將軍會提督孔廣順等由曹家  
河殲賊三千餘人克復廣濟縣初九日由大河鋪攻  
黃梅都將軍率翼長多隆阿副將王國才都司石清

吉等分路盪決斃賊無數克復縣城官大臣胡巡撫  
既分遣羣師悉東下尋顧念腹心兵單鄰逆尙熾江  
西之瑞州義甯與崇陽通城壤地犬牙相錯可不闕  
防奏留湖南候選道王鑫迅提精銳埽崇通界以固  
鄂北藩籬

通城崇陽蒲圻通山餘匪平

四縣地險而俗悍逆入楚北皆爲陸道衝乘機伏莽  
者漫村偏堡賊資以出入吏紳亦習常視之及王道  
鑫督湘勇至先攻通城之北港次遣同知張運蘭訓

導沈玉田勦崇陽蒲圻蠡逆目僞將軍張庸忠曾天  
爵梁一舉等搜穴焚巢殲斃數千蠡嘆曰彼賊如風  
此民如水水爲風撓終無靜止誅之可勝誅乎夫內  
奸不清外宄不可得而詰故團練者非獨禁盜兼可  
收捕盜之功也乃召邑父老子弟赦已往懲將來頒  
示成規有桀驚不受約束者軍法從事數月團練成  
按戶編籍民漸知滿洗圖自新蠡率以節次整刷遂  
抵通山一律遵奉罔敢抗違

曾侍郎至九江勞軍

江西自五年饒廣告陷賊悉衆踞湖口楚南水師分爲外江內湖隔閡不相通烽火逼省垣曾侍郎以省會者百城所矚無南昌是無江西也遂勒水陸軍兼程赴援且葺整舟師徐圖大舉時章門官私交迫戰士懸釜餽待炊爨不終日侍郎至調餽轉糧人心始定是年六月復南康湖南援軍至瑞州築壘遏賊次收袁州上月武漢報克城捷楊提督自蘄州抵潯陽會李續賓合圍九江章省亦疆圍堅固曾侍郎無西顧憂乃親至九江勞軍統水陸決志取九江以聯

絡內外

楚南軍克復江西之建昌瑞昌德安新喻永甯五縣

曾侍郎由省派千總張金璧等帶勇赴建昌擊敗德安援賊克復縣城南旋省又爲賊匪竄陷十二月初三日復往克之李續賓自興國大冶追賊東下十二月初六日駐軍瑞昌縣上十里亭子山逆己先遁收復縣城李續賓進攻九江派弁收復德安縣候選道劉長佑率楚勇及投誠之李能通由袁州赴分宜賊己退踞新喻經十二月初八日在寶山遇賊李能通

匹馬衝陣各勇鼓譟從之賊遁入城我軍從入遂出  
東門遁去同知趙煥聯會湖南鄱縣各軍攻永甯亦  
於是月十三日拔之獲偽協理王起盛等



平定粵匪紀略卷六

咸豐七年丁巳正月江南軍攻敗句容逆

江南大營退駐丹陽後逆踞句容屢出窺伺正月二十六日張提督國樑調集兵勇四路合攻張提督獨領壯健間道抵城下焚燒外壘斬黃衣騎馬賊首斃賊千數百名橫尸塞濠生擒七名逆不敢復出

楚南軍克復江西奉新縣

縣距省百二十里賊盤踞久江西軍不遑分勦流毒煽虐百姓銜之刺骨湖南援軍同知吳坤修旣克安

義靖安二縣在籍辨團御史帥方蔚貽書勸攻奉新  
坤修辭以兵單恐難必克方蔚曰姑督隊來當飭民  
勇助聲勢乘衆怒之氣挾屢勝之威必克無疑也正  
月初五日坤修發隊至逼城爲營四鄉義勇皆號衣  
纏頭儼軍家裝攜器械來會金鼓之聲十餘里賊登  
高瞭望驚以爲大軍薄城不敢拒戰謀宵遁我軍由  
北門獅子山梯繩入餘賊無多盡殲之

二月會侍郎以父憂解任提督銜總兵楊載福等分領

其軍

武昌之陷也曾侍郎畱塔提督羅澤南攻九江而遣  
道員彭玉麟援鄂及僞翼王石達開躡江西連陷瑞  
臨袁吉建撫諸郡又檄玉麟赴援時湖江道梗易服  
爲賈客躡繭千里達大營轉戰頻捷屢收殤近州邑  
上年冬武昌克復楊提督載福統水師至九江而曾  
侍郎適丁外艱

朝議奪情固請終制

上特嘉其孝給假歸里兵勇暫交其弟同知曾國華管帶  
上恐職分較卑須大員統理

詔提督銜湖北鄖陽鎮總兵楊載福就近統領而以廣東  
惠潮嘉道彭玉麟協同調度

揚州軍擊敗瓜州撲營賊水陸竝捷

是月瓜州賊分途狙擾諸路逆同出撲營德大臣檄  
參領富明阿總兵鞠殿華副將陳國泰迎勦有功連  
奪要隘沿河賊艇亦爲我水師總兵周士法擊覆馬  
隊官成明海全亦至三面兜圍旬日之間迅掃賊衆  
斬殺數百名獲其僞檢點監軍二名

江南軍進勦溧水敗援賊於鄔山

金陵安慶逆偵溧水勢蹙出大隊至卽山築壘爲援  
二月初七日和大臣飭副將魯占鰲傅振邦乘賊營  
未定邀之賊敗走渡河復結壘四座副將李定泰都  
司鄧聯科周光培分三路環攻先以羸卒誘賊出追  
一伏其後一衝其旁焚燬賊壘而誘賊之卒易精銳  
回擊賊奔潰自相踐藉徧野橫尸遂合兵攻溧水城  
副將米興朝敗其出城賊前後共平賊壘二十六座  
殲賊三千餘斬首六百級斃逆目僞靠天侯以下十  
餘名生擒八十餘名移營已及一年戰功無逾是役

逆黨圍壽州署廬鳳道金光筋擊走之

壽州古壽春形勝地故置重兵鎮守焉二月十九日賊從西北來攻兩門邀戰敗之二十日復進攻南門廬鳳道金光筋督兵勇激厲同心嬰城固守而時出精騎攔截之二十二日賊擁至愈衆合圍驟攻光筋飭壽州知州黃元吉鳳臺縣知縣李霖勇目朱在國募死士縋城斫其營斬驍賊二十餘逆鋒大挫遂定議力戰約鄉圍舉火爲接應二十五日整隊開東門出擊奮勇酣戰自辰至酉團勇四至助勢縱火焚巢

賊棄營潰走追殺二十餘里斃賊千餘名斬首二百級重圍立解越旬又攻正陽迤東之枸杞圍賊壘飭練勇孫家熾等由雙橋橫擊斃賊二千餘刺死僞將軍吳守剛僞先鋒楊得應張定邦竄賊悉數殲除自此逆燄不敢近壽州光筭勇敢素著屢立戰功奉旨加按察使銜後於四月勦正陽關捻匪身受重傷猶復揮兵督戰河深溜急舟覆而亡

浙軍收復安徽婺源縣參將師長鏢陣亡

江西景德鎮賊竄陷安徽婺源縣圖犯浙浙江晏巡

撫端書飭總兵周天受督勦賊由香口竄穰溪河等處二月二十七日復犯三折嶺知縣楊裕仁督率團勇會游擊王夢齡及留防五嶺之吳偉奇等同時進攻賊受創潰走收復婺源縣已革參將師長鑣於三年十一月在揚營因勇潰獲譴旋隨吉巡撫於鎮江奉調赴浙屢著勞績是役力戰陣亡奉

旨開復原官照例議卹

江西軍擊敗撫州賊

撫州賊會合梅港匪黨竄入貴溪之膺潭屯踞街市



另股自婺源竄入興安弋陽江西巡撫文俊飭同知李元度督營官楊得意等率水陸軍馳援擊退婺源逆斃大旂悍賊數人乘勝撲進虜潭火攻街市豫飭師船剋期至內外夾擊焚燬溺斃統計二千餘名宿松太湖逆犯黃梅縣楚軍大捷

九江爲江西重鎮皖楚咽喉逆力爭天險匯踞九江而以對岸黃梅之小池口爲外蔽官自軍進達九江宿松諸逆首聚衆數萬築城於小池口以遏拒官軍岡上竄李臬司孟羣楊提督載福遣將弁迎勦燬其

壁壘是月賊衆分三路入寇一出停前驛之南一出  
停前驛之北後隊由獨山鎮結營於魏家涼亭距黃  
梅城僅數十里騎賊千餘效我軍馳驟近郊燄張甚  
都將軍曰彼假虎耀威耳豈能如吾軍走馬施槍捷  
若星月哉吾知所以破之矣知縣覃瀚元以邑垣脆  
薄不足保請空城誘賊入可聚而殲之將軍以爲然  
派提督孔廣順營大河舖爲旁翼總兵王國才駐桂  
家畝爲後拒營總多隆阿伏城南游擊倭克錦衣伏  
城北副將鮑超都司方映川伏城西營總巴依爾呼

蘭爲往來接應約俟破騎馬賊後合力並攻遂勒騎  
獨當賊東面不動逆果悉衆自二郎河東山鎮撲縣  
城直入都將軍撥馬率隊抄勦疊發連環槍賊不能  
禦紛墮馬下又運矛攢刺馬足賊落輒踐蹋之騎馬  
賊無一生還者諸路軍建旂鼓會圍斬殺近萬賊棄  
城逃命分途截擊斬其僞擣天侯陳姓僞天王婿鍾  
姓曾姓三名收馬騾無數狂逆在小池口者聞風膽  
喪

三月官大臣檄臬司李孟羣督兵援皖

逆匪於皖北肆意衝突上月壽春鎮總兵鄭魁士兵  
潰於桐城文武大吏俱獲譴

上屢念廬州重地密邇桐城備豫宜嚴

命湖北撥水陸軍協堵是時襄豫餘匪突入宜昌府城雖  
卽克復而荆襄防兵難於抽調水師又已齊集湖口  
迅圖九江乃奏稱孟羣謀勇素優最利行陣令督兵  
二千五百人裹糧援皖

楚軍進攻小池口削平附近諸賊壘

逆踞小池口築堅城爲固守計復於段審楓樹坳獨

山鎮各處依山砌石爲壘數十座引水浚濠以屏蔽  
小池口而阻我東下之師都將軍戒諸營官曰小池  
口者九江犄角也沿山諸壘者小池口爪牙也爪牙  
不除何日拔其角而扼其吭乃先遣鮑超攻小池口  
城西牽掣賊勢不令出而部署諸營弁多隆阿王國  
才等分途攻段窰楓樹坳旣破其壘斬馘千餘遂捲  
甲疾趨獨山鎮提督孔廣順以輕騎誘賊出巢而令  
馬步隊各伏要隘賊出追開化勇越濠拔椿簽焚燬  
篷棚賊大驚回救伏兵齊起縱橫盪決僵尸枕藉請

隘壘悉平惟小池口尙拮据自支

四月揚州軍大捷於瓜州

時大軍圍攻已久逆屢形危蹙乃出背城計水陸並  
撲德大臣遣參領富明阿擊之於土橋斃賊三百擒  
其偽總制二名總兵成明等踰濠毀礮臺二座斃賊  
五百總兵鞠殿華亦敗賊於四里舖賊以大船數十  
划船無數衝鋒進分兩路一沿港助勢一渡江他擾  
均爲水師所敗陣斬偽將軍統計連旬共殺俘賊一  
千三四百名焚溺死者甚多

楚軍克復英山縣

英山先爲皖軍克復四月初六日逆匪復竄踞之以  
通蘄黃爲上竄計署蘄州知州兼署羅田縣知縣彭  
應鯉由大河坂越境進攻適李臬司孟羣援軍取道  
至皖飭都司盧文熊參將趙鴻舉併力扼擊斬騎馬  
逆目四名生擒三百餘名餘賊太潰縣城立復  
皖逆犯湖北界連戰破之

逆首陳玉成由桐城率賊三萬餘沿途裹脅號稱十  
萬竄擾湖北之黃梅廣濟蘄水蘄州羅田諸邊界官

大臣派臬司李績賓帶湘左右營駐小池口以小池口原駐之統帶五營副將鮑超移屯孔壠黃梅阻遏逆衝其蘄州羅田則調福武寶三營應援恭鳳虎三營繼之又派都司段清平張志超趨黃州扼蘄水竄省之路逆衆各路分撲均經擊退副都統舒保巴楊阿等旋領勝兵自襄陽宜昌至會都將軍分途迎勦斬殺數千破賊壘二十一座軍威振而衆志益固官大臣上方略曰勦賊之道首貴摧堅九江者吳楚關鍵也江西兵勇數盈五萬餽糈日籌而九江圍城尙



關一面以致踞逆進犯湖北退擾章皖游行掉臂防  
不勝防九江若拔則可以直搗金陵而東南免奔疲  
之累昔吳臣紀陟言長江五千七百里疆界雖遙而  
險要必爭之地不過數四所謂險要必爭者荆襄武  
漢九江湖口耳今上游悉定討賊急務必盡力攻克  
九江而後江西之門戶以保江南之全局可圖時議  
欲分援江皖故抗疏縷陳之

五月九江軍濬長濠困賊屢戰勝之水師深入失利尋  
獲捷

初臬司李續賓督步騎會水師攻九江逼城爲營自  
官牌夾迤南而東至白水湖募丁夫掘濠三十餘里  
深二丈廣三丈五尺踞逆患之東西出賊六千餘人  
欲圖格沮李臬司令步隊護濠戒勿戰親率馬隊繞  
至八百坡後岡又伏兵於馬宿嶺約俟坡後礮發出  
擊約兩時許賊已逼近各軍聞礮聲齊出殺賊三百  
餘名追斬七百餘名賊旋出西壩伏於坡後茶庵李  
臬司乃繞道譚家畝楊樹背先敗其伏而伏我兵於  
其處回隊迎敵且戰且走至伏所賊不知其伏之已

敗也正以爲得計及伏起官軍也倉皇潰奔掩殺無  
算越旬餘安慶逆來援約衆七八千城逆大出衆二  
萬蜿蜒數里旂幟如林我陸軍飛檄舟師會勦楊提  
督遣水營將弁從甘棠湖趨城下轟退援賊陸路軍  
亦敗賊於湖坪自三月至五月連戰皆捷水營副將  
李成謀守備易景照見賊船數十隻上駛乘屢勝之  
威從老河追之深入湖口距本營已百餘里爲梅家  
洲扁擔夾賊艇所襲風水俱逆不能駛歸失戰船十  
餘隻揚提督出防武穴駛回救之成謀鼓勇再入賊

方賀功未設備成謀率衆驟進獲賊舫板船四隻沈  
逆船百餘李臬司亦撥隊接應北岸之聲勢益壯

### 江南軍克復溧水城

逆踞溧水後招援賊黨集圖大營屢加懲創斬殺約  
以萬計勢雖危蹙猶抗拒復於郎山築壘數十座五  
月十四日總兵傅振邦督營官周天培等節攻環擊  
令賊首尾不暇顧外壘數十座以次削平乃會集城  
下噴火如繁星飛墮大燒城中房屋賊內亂副將虎  
坤元率衆突燄登西北二門斬守城賊酋官軍齊入

殲盪六千餘名生擒三百兼斃其僞副丞相

閏五月皖逆悉衆復犯湖北

英山霍山二縣近羅田而黃梅蘄州山徑歧出多與  
宿松太湖相通皖逆自四月上犯疊受斬刈旋去復  
來都將軍督各營諸將分途堵禦已敗賊於大河舖  
逆趨武穴圍阻截我軍糧道馬步力擊之水師搶護  
毀其四壘我軍益修營十里舖以資轉運爲謹護計  
賊數出擾斬其驍健營壘始成壘敗賊於張家塆青  
石嶺汪家壩望天畝合節山黃土岡桐梓河等處前

後一月之久大小二十五六戰平賊壘十有餘座殲逆目三名斃賊衆七千有奇而賊裹脅太多殄滅難盡仍踞蘄州

江南軍克復句容縣

金陵逆陷踞溧水句容成犄角勢和大臣已克溧水謀取句容而城逆句接外援聲勢尙壯閏五月二十一日張提督國樑會總兵傅振邦圍攻賊以大股抗拒張提督率親兵衝入立刺執旂黃衣悍目數名賊乃奔潰和大臣揮軍衝進內濠殺賊無算二十四日

銜枚急進越濠豎立雲梯張提督首先登城賊尸山積遂於二十五日夜克復縣城

湖北胡巡撫馳赴前軍部署方略

時蘄黃一路賊蹤狂甚閏五月二十七日蘄州諸營並挫賴舒保力戰水師左光培等扼巴河得免上竄官大臣飭諸營謹守復派道員唐訓方領帶增添馬步擇要堵禦飛咨都將軍力扼黃梅嚴後路之防整齊行陣先爲不可敗以徐圖可勝並咨商胡巡撫親赴下游察驗前軍營壘情形申明軍法指示方略力

固危疆以是黃州上下烽火雖驚而武漢商賈懋遷  
耕耨不變

六月皖逆傾巢援蕪黃楚軍戒嚴

李臬司續賓浚長濠力攻九江水師礮船復沿江環  
擊賊衆多死宿松太湖羣逆糾合皖省饑民十餘萬  
乘虛圖武漢且解九江之圍分四路進一據黃梅之  
停前驛參將石清吉禦之一屯廣濟之大河鋪孔廣  
順王國才禦之大河鋪地勢尤要助以副都統巴揚  
阿知府許賡藻一紮蕪州之張家塆知府邢高魁彭



應鯉朱啓仁帶練勇禦之一聚薪水之劉公河副都  
統舒保記名道唐訓方禦之大小戰五十餘殺賊一  
萬有奇賊勢未衰我兵亦有傷亡初小池口之勝也  
北岸官軍近三萬馬隊調良皆精於技擊南岸亦師  
船林植溥陽湖口立望肅清及皖逆間道上援九江  
之陸軍梗阻而上游舟師又不可驟撤楚軍馬步不  
及萬南勇入險失利而賊所竄伏之徑皆崎嶇泥淖  
難於衝突馬隊幾勇無可施惟統將一心壯士併力  
屹然不爲所憾

楚軍擊逆衆於童司牌克之

楊提督聞蘄黃有警派都司胡友亮率礮船節次上堵復戒之曰賊不橫江必憑湖當順道繞廣濟以扼內湖之險李臬司先遣其弟知府李續宜督南勇三營由瑞州回援逆大隊果據廣濟內湖之童司牌深溝高壘伺隙後動十里舖在童司牌之北逆精悍所聚而西有億生寺道險狹翼長多隆阿與副將鮑超定議向十里舖進攻而以勁旅繞道襲億生寺逆排隊方注意北路而不虞西路之掩至也乘其驚駭擊

敗之復與十里舖合兵兩路獲勝逆又造浮橋於河  
中東通北湖西連武穴築壘綿亘望之若長虹會李  
續賓親督隊伍自南岸渡江至六月二十九日統三  
營爲左右中以進先擊其腰開劈山礮轟之首尾不  
救紛紛墜溺盡平兩岸賊壘其內湖賊艇復爲胡友  
亮礮船所焚竝燒其浮橋是役也共平逆壘十九座  
殲逆目十餘俘斬以數千計惟貴州安義鎮總兵王  
國才於移營時爲火礮轟傷陣亡胡巡撫旋率唐訓  
方紮營黃岡之傅家嶺分撥巴揚阿守馬鞍山要隘

參領舒保爲諸路接應戰守咸備逆賊稍衰

七月楚軍勦逆於黃梅破其要衝

李續宜援勇至黃州都司左光培亦以礮船巡巴河  
上下屢有擒斬重以胡巡撫繕輯裁制軍氣益揚遂  
於七月初一日攻黃臘山翼長多隆阿謂賊所守壘  
者必疲病老弱也其强悍驍銳皆伏邨落約鮑超分  
兵繞賊壘之後自以精騎直衝邨落殪伏賊數十鮑  
超亦縱火焚燒合軍勦洗蹋毀黃臘山附近之甘家  
坂王家河賊壘四十八座斬賊五千餘溪水爲赤生

擒長髮老賊數百名正法下游賊窟漸空而在蘄黃者仍不下數萬官大臣令水師中營都司宋美富領礮船扼蘄黃江面竝先於六月二十六日拆毀菩堤壩賊巢擊散賊衆陸軍沿要設防各逆上竄之路始絕其孫家觜流水灣踞逆當黃岡蘄水之衝胡巡撫遣知府李續宐率五營進攻以馬隊舒保繼之游擊孫昌凱左光培統水師會勦竝令唐道訓方與同知唐協和督勇伏鳳凰山右都司余雲龍余際昌伏鳳凰山前以拒柳家灣馬家團之援賊又派參將何紹

彩繞山岡爲疑兵防其抄擊五路皆捷統計陣斬及溺斃者三千餘名追埽巢穴斬黃路通

### 江楚軍克復瑞州府

瑞州舊有南北城逆竝踞之上年七月官軍攻克南城而商賈居民多奸宄與賊通氣不可驟詰同知曾國華副將普承堯商同築堅壘於南岸屹如石城尋於石鼓嶺環以雉堞北岸亦固數絕逆糧道援師曾侍郎勞軍之月飭瑞州效九江圍城法撥水師數百往來巡防兼護長濠逆勢益蹙至是楊提督彭道玉

麟遣水師會楚軍水陸助攻逆突圍潰走我軍血戰  
夾擊之俘斬極多府城遂復謀搆臨江

楚軍復大創皖逆於黃岡蕪水界

官軍旣破孫家背流水灣二賊壘而黃蕪連界之馬  
家河大石港火樹林等處賊勢尙強知府李續宜以  
地形已審願率所部爲前驅胡巡撫壯其言派十二  
營馬步令統之益以副都統舒保帶湘寶三營爲後  
隊相機助戰續宜分軍爲三路而進七月十八日黎  
明賊出三千人拒右路四千人拒中路大隊八九千

直撲我左路續宐登高望謂舒都統曰賊入吾彀中矣彼弱當吾強而強當吾弱能先勝其左則右亦不支然後合力於中軍乃密派張文煥劉芳貴等選諸營勁旅由山左蛇行襲其後而自領中軍竝馬隊掩旂息鼓出不意擊其前左路之賊潰我左營與中軍合於是如竹節已解無停刃遂克其中路唐道訓方同知唐協和率右營力攻右路右路之賊亦潰鏖戰未日沒賊三路皆退焚其老營營中賊悉燔死賊之未歸壘者網張禽獮無倖免者黃岡肅清賊勢孤



乘勝搜勦連戰皆捷破僞城五座賊壘百餘擒斬逆  
目僞檢點僞指揮三十四名

八月小池口逆壘平

自黃岡蕪水戰勝賊望風披靡蘭溪月山之兵所向  
無敵直抵小池口小池口與潯城隔江對峙爲江皖  
入楚咽喉逆先壘石爲城浚濠外衛內築重垣堅固  
無匹官大臣胡巡撫以賊饑正衰亟宜水陸大舉咨  
行都將軍楊提督上下合勦先拔小池口僞城以撤  
其犄角胡巡撫親督唐訓方李續宜等湘勇由蕪水

達黃梅設卡建礮塞宿松上竄之路復商令都將軍  
多隆阿鮑超破黃梅後山至五里涼亭三賊巢楊提  
督等礮船亦於八月初四日自陸家觜移營進逼晝  
夜環攻偵知僞城內炊爨之具已被大礮擊碎炊煙  
數日不起賊不敢復立女牆乃飭各軍士攜稻草沙  
囊爲填濠登城具十五日風雨大作兵勇以稻草堆  
地障身而進頃刻濠已填平楊提督趣十四營水陸  
環薄之都將軍縱馬隊施火箭射城內賊箠一時火  
起四門官軍乘賊亂亟登悉除察看城內擊斃

之尸積如山阜自小池口之逆滅盡全楚始一律肅清

江西軍克復東鄉縣

縣隸撫州爲賊踞已久復新踞萬年等縣福將軍興以東鄉爲撫城保障必拔之而撫州可圖乃遣總兵李定泰於八月二十八日冒雨由五里牌進擊命縱火平塘絕賊竄路平塘者附城往撫州之衝也賊果懼棄城而逃遂乘勝攻金谿

九月楚軍克復江西湖口縣

初逆踞石鐘山悉銳守湖口兩岸致外江內湖之水  
師間阻蕭提督捷三統舟師屢擊不克中礮卒及楊  
提督等總理內外水師軍威壯盛然江湖迄不能合  
者以石鐘山爲之隔閡也協理水師廣東惠潮嘉道  
彭玉麟建議力攻湖口若石鐘山拔則九江可唾手  
得是月楚軍已克小池口乘勝下勦李臬司續賓密  
商楊提督彭道水陸夾攻爲聲東擊西策湖內舟師  
冒死衝出湖口集山前結營布陣賊衆堵禦而李臬  
司先拔營起傳令勦宿太餘匪中道折回乘夜渡江

繞湖口山後出賊不意撼其城總管巴依爾呼蘭督  
馬隊亦由陸路濟八里江爲應兵內外夾攻於九月  
初九日克復湖口縣遂破梅家洲僞城燔石鐘山賊  
巢巖壁皆赭獲戰艦八十九巨礮千二百有三殄悍  
賊萬餘外江內湖水師之三載阻絕者乃得合併是  
役也水師裹創血戰傷亡極多幸以死命爭得之事  
平彭道商之曾侍郎請於

朝立楚軍昭忠祠於石鐘山頂祀水師之前後歿於

王事者

楚南援軍敗江西臨江賊於太平墟皋田

官軍圍臨江亟撫建新淦之賊奔援候選道劉長佑  
奉湖南駱巡撫檄同副將蕭啓江督楚南兵勇赴臨  
江協勦八月二十七日距太平墟五里遇賊接仗乘  
勝追奔共蹋賊營五十三座同知王勳聞賊擾太平  
墟亦率部往助斬賊六百餘生擒三百餘敗賊狂竄  
皋田九月初六日知府張運蘭移營獅子山賊傾巢  
至設伏夾擊亦殲斃千餘援賊悉敗三路兵勇合擊

臨江

皖軍水陸大捷焚燬逆艇壘略盡

逆自楚北敗竄回皖糾合河南捻匪撲廬州府及巢縣之柘皋九月二十七日安徽福巡撫檄總兵吉順等分路堵截敗其援賊殲斃三千餘斬首六百級柘皋諸賊壘悉平而柘皋迤南之巢湖淮河丙子舖逆船如鷺聚散游衍爲運糧地鄭總兵魁士命輕舸順風縱火盡焚其帆檣獲大艦十餘小艇無數燒斃四百餘名生擒僞指揮陳上林先是逆前隊陷桃鎮官軍水陸旣大捷遂派副將蕭開甲游擊聶桂榮知府

今浙江巡撫馬新貽會合得勝兵節次追勦搜殺各  
要隘挑鎮派河上下悉無賊蹤

楚南軍克復江西彭澤縣

湖口下六十里爲彭澤縣南有小孤山挺立江中逆  
印廟成壘設礮當門爲居高建甌勢南北兩岸復修  
築石城環以深濠密排椿木持此以守彭澤而爲九  
江聲援時逆首石達開會集都昌鄱湖賊踞景德鎮  
遣逆目賴漢英等抗守茲城已五年矣楊提督合軍  
進取以欲克九江非拔彭澤不爲功調馬隊營官巴



克坦布由橫壩頭趨北岸統帶湘凱兩營官楊得武由湖口趨南岸師船向縣城修營壘作長圍誘賊出鬪洋敗賊追至急水溝楊提督親統大軍由望江駛勦擒斬無算而李臬司續實亦率都司楊明萬等馬步合攻遂於九月二十二日克復縣城其南北岸石壘亦同日攻破盡埽小孤山賊巢下游之巨險悉夷乃分兵守彭澤湖口要隘大軍復回攻九江

江南軍勦鎮江逆壘獲大勝

鎮江賊嬰城固守諸路官軍持重伺釁以故久稽

天討九月二十二日鎮逆出東北兩門至甘露寺巡撫官  
營分路四掠和大臣檄總兵余萬青督兵迎勦先後  
殲斃六百餘名張提督國樑偵逆欲西竄接應金陵  
密於高資增營扼要賊亦築壘於運糧河之北遣參  
將余兆青都司賴鎮海督兵力戰毀其礮臺而自率  
親兵渡河奮擊總兵虎嵩林李德麟副將今廣西提  
督馮子材亦水陸會攻壘戰六晝夜沈賊巨艦十餘  
隻削堅壘二座生擒逆目魏長仁等六名斬俘無數  
十月江楚軍擊安仁逆於貴溪敗走之

景德鎮股匪竄踞安仁縣後復糾衆三萬餘分擾貴溪經福將軍興派同知李元度守陣捍禦相持浹旬備益堅不可陷安仁逆復遣賊接援練紳姚步瀛聞風迎堵於貴溪境外敗其援衆元度知攻城賊已懈鄉兵獲捷十月初二日奮勇潛出東門直衝賊壘揮矛躍馬如摧拉枯朽賊潰走城賴以完

江西逆股竄祁門浙軍截勦連勝於五里牌

十月初一等日江西浮梁賊匪竄安徽祁門縣境經浙江晏巡撫所派游擊馬懷珍擊斃多名退踞五里

牌復經周天受江長貴自率勦旅督戰焚其木卡斃賊五百餘名生擒四十六名追殺三十餘里

楚軍水師克復安徽望江東流銅陵三縣

先是江南水師定海鎮總兵李德麟率紅單船自下游入皖勦賊至繁昌縣之舊縣峽口爲賊艇遏抑不得上賊沿江岸築壘聲勢聯絡困我師已七閱月楚軍水師楊提督克湖口彭澤東下所過焚賊船無數安慶首逆僞成天豫陳玉成派僞丞相曾逆帶船數百號乘風而來泊馬當峽華陽鎮一帶楊提督率各

營奮力攻勦兩處賊船敗退追殺二十餘里焚奪略盡九月二十二日焚華陽鎮二十三日派李成謀一營克復望江縣二十四日乘勝復東流縣疾趨安慶攻破西門外鹽河口及對岸賊壘各三座二十五日寅刻全軍衝安慶而下未刻破縱陽二十六日破大通鎮二十八日攻銅陵縣李成謀斬關直入立克縣城又破土橋賊壘至舊縣峽內與紅單船合不出旬日轉戰一千餘里克復三城疊破卡壘羣賊望風瓦解附近之泥汊賊築堅城二座紅單船懸賞萬六千

金卒不能克楊提督親統各軍直逼偽城李成謀率  
衆前驅拋擲火彈適中賊之火藥烈燄騰空城石迸  
裂我軍長驅直入勦戮殆盡得糧米六屋竝船礮軍  
火悉付紅單船爲勞軍費曰非爾輩扼要疲賊我軍  
雖銳成功不如此之速紅單船驟見旂幟正驚愕疑  
上游水師何以能飛渡也及見破泥汊賊壘咸愧服  
又饋饟豐刼驚桀感生誓同心協助咸稟籌畫楊提  
督旋聞江西有賊出竄十月十三日回軍駐彭澤

十一月揚州軍克復瓜州

逆憑險負嵎遙聯金陵近接鎮江阻官軍進勦之路  
歷五年矣官軍屢受牽掣一篲難收德大臣激將勵  
兵定期大舉適賊援之在南岸者爲和大臣懲創有  
隙可乘遂於十一月十二日派八成兵勇將土城四  
面圍裹大兵踰城而入逆衆無路脫逃殲斃千餘人  
蹋平賊壘五座其登舟南竄之賊被艇師截擊溺斃  
無遺卽於是日得瓜州城

江南軍同日克復鎮江城

十月二十九日張提督國樑大捷於瓜州之南岸陣

斬僞王奪壘十七座遂圍鎮江城副將虎坤元等追  
勦金陵四次援賊匹馬片帆無返者城賊猶死拒十  
一月十二日張提督會總兵虎嵩林劉季三余萬青  
李若珠等四門驟攻潰垣入悉誅羣逆是日亥刻克  
復郡城有突鋒逸出高資倉頭者同時追勦沿江搜  
殺約計萬人惟逆首吳知孝潰圍逸至金陵復竄皖  
北後於九年八月在盱眙爲總兵張得勝陣斬  
楚軍勦援賊於安徽太湖等處

江西逆渠糾大股二萬數千人由浮梁建德都昌鄱



陽竄湖口楊提督已泝江回駐彭澤嚴申戒備而宿  
松太湖之逆憤九江困圍糾黨齎集於楓香驛仙田  
舖紫方界水河等處聲勢相依合計不下五六萬官  
大臣已以湖口任楊提督復書最都將軍極意周防  
將軍乃於十一月十五日督隊簡員派糧道唐訓方  
駐陳德圍固蘄州門戶翼長多隆阿副將鮑超領石  
清吉西林布祿昌鄭陽和等迎勦太湖馬步竝進斬  
四千餘賊唐道亦敗賊於陳德圍級功相埒是時楊  
提督之師已大獲全勝李布政續賓撥陸勇五千遣

候選道李續宜會水師彭道玉麟分三路直搗水陸相資竒正互出戰必有功斃賊七千餘名邀擊殲溺五六千統計盈二萬有竒裹脅之衆羣散隊攜又將萬餘逆勢大挫

十二月皖逆陷霍山縣城旋即收復楚北軍分防羅田麻城

江南北既收瓜鎮敗賊竄聚安慶楊提督圍九江得手不便分兵堵禦而潛山太湖之逆又陷霍山縣旋退出欲從羅田麻城圖上犯踞獨山西河口爲營李

布政孟羣所統入皖之兵較單難於兼顧因奏請

飭楚北撥兵防勦官大臣前因逆匪勾結各趁近河南之  
商城固始與湖北羅田麻城毗鄰已遣員帶兵勇設  
防守隘遂上言鄂居天下之中道途四達密邇賊氛  
路徑紛歧未敢鬆懈將軍都興阿兵力太寡無可分  
撥謹再調九江步軍三千名撥暫駐襄陽之馬隊二  
百兼程馳赴豫皖接壤處相機進勦以固楚疆

楚南軍克復江西臨江府餘匪竄楚境擊殲之

楚南援軍候選道劉長佑等於八月二十七九月初

六等日破太平墟皋田各賊與副將普承堯等合兵  
攻臨江府十二月初八日拔之餘匪由瑞州德安瑞  
昌竄入湖北興國州境在籍給事中陳光亨集團防  
守浙江布政使李續賓派兵一千六百人於十二月  
二十五日自瑞昌馳援九江兵勇亦先期馳至副將  
周寬世等率馬步四面兜圍殺賊一千餘人溺斃無  
數餘賊僅二百餘名覓水逃逸